

處

實

堂

集

處實堂續集卷之五

戊巳稿

長洲張鳳翼伯起撰

四言

倚伏詩

茫茫禍福循環倚伏何賤匪貴奚笑非哭塞翁得馬宋人
生犢相以折脇師緣則足客卿乃入穰侯則逐在李難封
若䟽不辱寄言世人勿事逐逐知雄守雌爲天下谷

賓鶴三章章六句題王大父別號圖卷

此于大父賓鶴翁別號圖

誄也元平則大父字也大父隱德弗耀而門外多長者車轍若文太史王別駕唐解元輩皆號爲莫逆而張銀臺所稱忘年交者也大父庭秦二鶴賓至則舞賓退則與鶴相對若賓然因自號賓鶴而

諸公圖詠卷帙頗多此其一耳後多散失存者無幾子弟幼于敦尚先德偶遇此卷欣然購之屬予識焉子童年及見大父許以昌大門閭今不肖既負先子矣幼于則不及見大父得此卷猶見大父馬固宜珍襲以貽後之人與
因為賦有鶴三章章六句

有鶴巢雲賓於薜園匪賓則仙維圖則存眷言先德以裕
後昆

有鳥鶴鶴誰其賓斯考我祖德宜爾孫枝展思既遐出涕
漣漣

翼翼飛鳥既鮮既皦我祖云徂歸彼華表爰瞻爰念期爾
克紹

五言古

懶癖

懶性漸成癖，經時不出門。披衣若被鎧，頂冠如戴盆。况乃苦炎燄，里巷兼災屯。散髮謝應接，日夕涉小園。板輿時御，毋慈顏。開弄孫，澄潭蔭藜薄。撫景聊命尊。

秋雨頓寒作

一雨連信宿，秋氣倏以深。兼之北風涼，露重寒蟹吟。時序有代謝，感茲傷我心。安得服大丹，毋令霜鬢侵。

古意

子與不殺人，慈母固見疑。叔子不為醜，敵國乃信之。孰謂敵國親，甚於賢母慈。忠信豈異德，疑信乃若茲。知否不足

論所遭自殊時

憂旱

仲夏興東菑田功當及時浹旬雲霓望屯膏胡弗施焦土
成石田荷鋤亦奚為禾秧日以槁桔槔日以疲析甘司巫
死但令行道悲火龍動訛言旱魃劉群黎山叟不聽講畢
星水氣離比屋多青病何可仍荐饑三復雲漢章恫此靡
孑遺人旱詎有因陽危胡獨罹巨室充積倉老弱皆驚鰥
貧者就溝壑富者亦傾危養食甘枵腹杞憂徒自嗤

七言古

題謝思忠西湖圖送其從孫遊擊赴任武林

昔遊武林泛西湖今見西湖入畫圖滿堂紫翠如可即却
憶丹青不我誣飛來一峰後飛去偶與縹緗忽相遇蘇堤
縹緗六橋煙岳墳彷彿棲霞樹天竺參差窺海門洞中誰
復呼清猿遊騎相先渾欲語酒船競發還疑喧九里松孤
山鶴月巖明月常不落君今宦遊向西湖選勝惟須按圖
索楚人忘弓楚得之何須賭墅借圍棋東山自是君家物
安石風流端在茲

讀王長公元美哭弟詩作此寄慰

予昔春明哭弟時東風早折庭花枝君今哭弟鳳城裏鳳
凰臺空魯麟死子弟無兒復數奇君弟貴有鹿鹿兒雖云

天數同歸盡足慰目前良在茲子弟初亡夢來頻夢中不
異醒時真請君破涕枕席上未必琴亡夢裏人

巫山高

巫山高高湘水深美人一笑千黃金登高送遠淚沾襟夢
魂不來傷我心屋梁月落夜沉沉空堂不聞瑤華音

感米

世人盡笑於陵子三公不易井上李何如金馬東方氏二
十萬言一囊米江南米價如湧潮潮落米價猶然高先生
筆耕甚寥寥一家數口空嗷嗷

感事示兆通

大丈夫不為甘羅十二卿，即為陶朱五湖遊。安能矻矻事
佔俾，白首握珠猶暗投。昨有客從南都歸，傳聞風浪土棘
關。勸君息肩戰藝場，從我逍遙白雲鄉。

為吳黃門公美題錢山人叔寶畫

雪川丹青推舜舉，百年耳孫步厥武。興來弄筆做松雪，雲
白山青宛村塢。石梁策馬覽春暉，綠楊一帶映朱衣。御溝
澄碧照清影，想見仙郎入瑣關。

胡元瑞見過走筆奉贈

傳聞卧病維揚者，走使南都報司馬。趣徵椽筆傳生平，不
意生還過吳下。江干倚棹訪蓬蒿，春暮畏寒猶緼袍。病骨

巖巖氣逾壯入門大叫驚兒曹為君開尊相勞苦讀君新
詩欲起舞長卿消渴休文瘦別有肝腸勇如虎歸來未可
歎迷津且著斑斕歡二親仲舒自有天人策他日一鳴驚
世人

子如見過慰之

燕寢凝香晝初起投刺扣扉者誰氏疏陳北闕推直臣詩
讀南陵稱孝子憶昨奪官來過予劇談抵掌何舒徐自言
失馬乃成福獲奉嚴親歡有餘今來憔悴涕如雨雙眸赤
腫不能覩斬焉衰絰未去身望門九頓不辭苦誰云賢者
不可測欣戚之間識賓主邇來輿論辨薰蕕推較雲間應

拔尤計日銓曹勤起廢會看綸綽賁松楸

昆吾行奉送按臺濟寧李公復命還朝應丁少叅命
任城使君古昆吾發劍即剖長洲符身親盤錯試利器廉
聲先已歌萊蕪三載恩威蕪召杜一夕書傳詠何怙十年
長繫兆庶心脫穎臺端天尺五江南水旱連三秋民瘼應
深當宁憂省方簡命下閭闔三江震澤成春流到時已
獲隨車雨棲鳥即是甘棠樹豈惟激揚如運斤還見仁恩
寓持斧吳黎待哺方嗷嗷往來胼胝獨賢勞百城涸轍藉
膏露四野民誼騰桔槔昔年陶冶伊誰始叅知少宰元同
里今日福星一再臨却似當時計桑梓秋風倏已及瓜期

寇君不借人怨悲江上紫烟催祖道日邊驄馬佇褰帷
硜硜尾尾慚猶昔折節叨勤問山澤漫詫飲音寄袞素風期
敢謂雲泥隔雙龍已見合延平畫繡偏宜竹馬迎施澤於
民嫌未久願言前席問蒼生

五言律

荆溪返棹示星兒

一自息機後已非行役身矧伊應結網當我罷垂綸
經雨花全濕迎風柳漫新所欣春酒熟歸壽北堂人

廢將

意氣感投醪生平付寶刀玉門三尺雪鐵甲一緋袍
苦戰

風塵暗論功霄漢高祗今惟血淚清夜泣龍韜

題清卿大樸圖記

大樸獨紛披玄亭對結莢雖遭匠石顧猶是斧斤遺將及
靈椿壽應存古栢姿無論寄山澤自足蔭群黎

沈處士

未尋獨行傳已見古人心偕隱航蓬累逸名醉竹林過門
猶荷簣入座即鳴琴何必嗣宗和嗒然鸞鳳音

仲氏笑予憂食賦此自解

我亦欲行樂但少辟穀方白晝枕上髮不充釜底糧淵明
謝五斗東方惟一囊俛仰至情係安能如首陽

賦得瓊岳送王孝廉計偕北上并致懸弧之祝

海岳鍾靈候公車薦剡年綵雲浮震澤旭日暖藍田獻璞
應收楚登臺快入燕須知大廷對無敢在王前

病後數過友人

萬事且隨綠河清豈待年有愁俱是障無病即為仙幸得
東籬酒寧論負郭田溷公知不厭聊復一陶然

混跡

混跡可容容膏明已戒龔浮生宜一葉足用藉三冬世態
朝觀種年華老種松時人好譏鳳吾道自猶龍

送吳黃門公美奉使還朝

使節曉乘潮，仙舟別望遙。
春風折楊柳，計日入雲霄。
民瘼悲鄉國，臣隣耻聖朝。
嘉謀應草就，知是採芻蕘。

賦得澗溪

不競揔輸君，悠然魚鳥群。
滄浪俱可濯，涇渭不須分。
入夜深浮月，因風淺度雲。
雖無舟楫用，亦自換人心。

送宋明府移家海虞

官箴本無玷，直道自難容。
即拜恩非薄，還家橐已空。
數椽卑息鷄，一水信征鴻。
賴有君鄉在，猶能養呂公。

送韓錫景魏以醫遊涼師錫為襄毅公後

似舅宜藏拙，繩先自出塵。
捧書投父執，懷刺倚門人。
拂袖

虞賓堂集卷之三
江干別揚鞭柳色新須知見垣者應不歎迷津

懷毛孝廉肇明

策蹇走風塵歸與已莫春有才堪脫穎無路即迷津按劍
誰稱屈投珠自為貧寧論棄繻事且慰倚閭人

懷胡孝廉元瑞

北闕辭明主東岡守故陂看花慚却詵落第似丘為天濶
冥鴻遠山長去馬遲何時共尊酒散髮坐臨池

贈別趙郡理仁甫

趙壁自連城何嫌水至清池陽三尺在江上一帆輕左次
緣官謗先驅藉政聲達觀隨宦拙不惜慰逢迎

送劉汀州入覲還閩

郡理舊平反重來五馬尊三年將奏最千里覲臨軒綵鷁
迴汀浦雲旌出薊門漢廷推吏治未許借劉琨

久旱米價飛涌得雨志喜

未雨空煩禱方來不俟求沛然露竹樹時若潤田疇雲起
神龍奮風行溽暑收寄言閑糶者天定勝人謀

憂米

農望絕苗畝饑殍計復踈况無田負郭寧免釜生魚數口
已不足三冬空有餘侏儒應大噓今并一囊虛

立秋前一日得雨志喜

薄暮歛雲峰迎秋雨勢濃未論催一葉猶可慰三農大火
乘烏鵲甘霖報土龍所欣支枕聽簷溜雜踈鐘

送陳郡理應召入京

郡理雄吳會徵書下楚材應持青萍劍獨上黃金臺夜月
江潮湧秋風片席開寧親知有便征旆莫相催

為沈罔卿純父寓題綠尊館

卜築繞清流開尊日勸酬心持三瓦戒興寄五湖秋倚醉
歌梁父臨風戀子牟莫嫌衣帶緩其柰廟廊憂

送顧明府赴任鄆城

鄆城為按臺
李公系梓

顧榮吳土望試宰魯門遊花縣三春雨琴堂五月秋民風

醉鉅野潦水淨盤溝白首無煩載儀刑有鄴侯

送徐參軍赴浙

書記重江藩觀濤向海門清時參幕畫妙歲拜新恩夜看
青萍劍春浮綠酒尊須知徐穉榻先已下陳蕃

賦得脩齋贈張國醫

小隱吳中市蜚聲肘後方箕裘綿仲景技術紹長桑無欲
觀名母清脩禮藥王牀頭春釀熟知是橘泉香

哭陳達可

陳名世顯子甥仲子為杭繁塔
蜚聲黌校不幸短命作詩哭之

飛鳴方在望摧折若為情愛汝予猶父臨喪舅亦甥泉塋
埋玉潤秬苑失金聲豈必途窮處偏能哭步兵

五言排律

大雪志喜

瑞雪霏殘臘，嘉徵兆有年。
土膏滋旱後，穡事卜幾先。
似月通宵白，疑霜入晝鮮。
乾元生意動，民瘼死灰然。
縞色千林變，歡聲萬戶傳。
擬珠還合浦，比玉產藍田。
調燮人謀盡，栽成帝力全。
絮飛成挾纒，鹽撒慰垂涎。
無待歌黃竹，何須長碧蓮。
當牕輝玉樹，堆砌潤靈護。
勿問僵袁卧，寧論返戴船。
祇宜釀春酒，擊壤醉堯天。

次韻答子厚宗侯

遙憐漢宗子，緘寄楚狂人。
書到成三復，光生動四隣。
雲烟

凌白社風物渺青蘋桐葉曾分晉桃花似避秦
求親通子建垂釣識玄真古道誰攻玉時情且賤珉
建安遺駿骨中壘是前身尉老龐眉在途窮白首新
連城懷趙璧折節下齊民却媿巴渝曲倉皇一和春

七言律

顧禮部弘任宅觀迎春遇雨呈沈郡公

春官門第早春催綵仗迎春帶雨開
令轉東皇應布澤民熙南國似登臺
佳人馬上行雲去歌者車前和雪迴
莫笑狂生巾折角為霖貪看使君來

同高時化過周兆通池上北寄兆通

魯國風塵燕市酒，揭來千里不辭勞。
故人祿厚交應薄，季子金多位亦高。
客舍蒯緱三尺劍，天涯涕淚一絺袍。
清池叢竹遙憐汝，莫待頭顱添二毛。

宋明府將遊浙過予言別贈此

春風黃鳥喚人愁，把酒長林說舊遊。
潦倒一官徒四壁，荒蕪五畝只扁舟。
途窮已敝襦，衡刺金盡誰憐季子裘。
聞說交知多按劍，握中明月莫輕投。

清明日荆溪旅懷

晝盡溪頭風雨頻，城隅停舟經二旬。
鄉心獨熱惟殘夢，旅食猶寒逢暮春。
破被終宵推愛子，斑衣累日曠慈親。
路傍

名利豈吾事池上桃花應笑人

為林江陰壽其尊君太守公

無煩太室覽真圖仙醴遙應出帝壺茅氏二龍隨五馬上
池三鳥引雙鳧藍田種就生烟玉合浦光掇照夜珠應有
釣天傳法曲登歌尾續媿吳歛

仲氏客白下者踰月矣一夕夢杜臧引卮酒進中多

荔枝紀以一律

乘舟訪戴鳳皇臺客座知啣何處杯江上久無鴻雁至酒
中安得荔枝來解揚杜簣人難醉被冷姜肱夢始回別後
已經燒筆硯西堂賦草媿非才

卧病顧春官弘任周文學懋脩携具見存

經時伏枕掩荆扉二仲相尋興不違溪上酒船行且至尊
前談雪坐來霏顧榮高簡疑龍卧周顛風流亦鳳輝病裏
不堪河朔飲空慚未晚客先回

是日也弘任先至坐候懋脩劇談時事感而有作
輕舸載酒過芸堂下榻風生暑氣涼豈必醅醖借公瑾已
知逸興屬長康病疑痼癖多泉石憂入江湖亦廟廊何日
蒼生起安石即今玉粟是吾鄉

朱價涌貴感而作

已無南畝可躬耕敢羨東家委積盈負背祗應如仲路折

腰那得似淵明身慵奔走艱糊口智乏竒羸拙養生靈雨
不開滋桂玉須知王掾價難評

立秋後毒熱連日望雨不至

虛教一葉報庭臺流火胡堪又復回不識水雲何處去未
知涼雨幾時來城頭苦憶商羊舞日下番疑旱魃催豈是
暴疋天有意饑民先已遍蒿萊

七夕暑甚

節序相催秋漸深赤龍當御暑仍侵似憐宋玉悲蕭瑟獨
許嵇康懋竹林豪客尚耽河朔飲幽閨不動暮城砧遙知
霄漢雙星會番笑斑姬團扇吟

送湯文學應試南畿

清明次第發瞻枝更喜寧親定省宜豈必竇林森五桂爭
如玄圃茂三芝麟經入選誇鴻漸鳳里當筵聽鹿詩計日
九成陪舜樂和鳴還擬奏堦箎

題明妃出塞圖

空將淑質付天驕漠漠風塵紫塞遙青草自存胡地塚黃
金莫贖漢宮腰雲中環佩魂難返馬上琵琶曲未調惟有
娥眉常鎖恨却疑綵筆未能描

題陸中丞北運遺跡

不佞為大宗伯門下士最久習聞中丞賢方中丞為明經時大

宗伯以司成在告不佞侯之而中丞適有田間行
適中丞既貴官九卿大宗伯復謝病中丞給假送

之還不佞下第禮闈歸舟相先後一夕抵房村風
濤相為顛逆退遂維谷始甚望前路有燈熒然勉
就之則一官舟已泊舟人相訊始知為中丞舟中
丞亦以通家故呼不佞為夜談頗舟高下懸不克
登遙報謝詰朝各解維中心藏之矣不佞幸為公
家門闕之廡且蒙相勞苦今讀茲疏能無樹於表
哉茲疏也所謂仁人之言其利溥哉不
佞不能贊一辭湯成四韻以志所感

蚤歲香名漫盈耳虛叨立雪長公門中道相望不相對方
舟昏黑泊房村神交未及緘書徃國計徒聞疏草存豈必
峴山能墮淚不須碑在亦消魂

秋日辭客聊遣病懷

亦知秋色好啣杯藥裹驚心逸興頽結駟任君題鳳去忘
機還我狎鷗來池頭花事寒仍放鏡裏年華雪已催強欲

臨風歌古調獨扶藜杖一登臺

夢贈

山中宰相醉鄉侯軒冕元從物外求避世不知經漢魏入
關何必歷商周桃花屈指三千朧海屋回頭一二籌更欲
尋幽雲夢澤偶逢仙侶岳陽樓

病後携尊城東過沈尚綱書畫舫

木落城隅幽興偏提壺還上米家船多愁自笑如平子博
物何能擬茂先生愛夕陽宜蕩槳行看天女欲叅禪須知
會意不在遠豈必乘槎日月邊

文基聖稀齡誕辰

白首燕臺賦上林歸來未滿橐中金
膝前寶柱看逾茂庭際田荆誼益深
通籍三朝身接武稱觴四世酒同斟
獨慚累葉通家者漫奏南山莫賞音

小樓

小閣巢雲非世情一從調息萬緣輕
窓中紫翠西山入屋角烟霞南浦平
棣萼前開輝几案桂叢後鬱護簷楹
謾言伏櫪心千里茗椀香爐足此生

薛士立使君入賀南還夜過小齋與周兆通同坐適
故年歌者一二人至

使君入進萬年觴歸袖猶携御座香
獨抱素心憐契濶不

辭促膝寄清狂情深卜夜霜威威興發醇醪玉漏長莫訝
何歡裘總敝故人先已鬢毛蒼

為文子悱郡貳介壽

百年族望冠東吳三載芳聲起治蒲未老懸車辭五馬不
須飛舄化雙鳧棣華並進中山酒玉樹相輝合浦珠莫訝
一籌添海屋歲星先已報桑弧

長至病起適吳伯恒方伯書問至

夜長更鼓漫相催支枕頻驚短夢回多病酒杯弓影亂遠
書空谷足音來啼饑幸免填溝壑慰勞遙憐及草萊應是
佳辰陽始復吹葭先暖不然灰

謝趙少宰寄月下白絹

匹練溶溶借月輝，須知苧布見應稀。
絲綸恍出鮫人室，杼軸疑從天女機。
只合黃扉供袞職，敢於白屋綴斑衣。
無緣拜賜成搔首，北斗遙瞻近紫微。

吳幼安有弄璋之兆賦此訊之

聞君昨已夢熊羆，屈指題弧喜及期。
但使參軍得新婦，毋論何物育馨兒。
珠生老蚌偏宜晚，玉產藍田不恨遲。
朝聽呢喃梁上語，烏衣應為報相知。

雪後沈周張唐四郡公携具過小園

報道軒車訪薜園，喜扶僵卧掃柴門。
連珠照夜凌冰檻，群

玉成山倒綠尊野菜可留鱸膾興醉醪能挽驢驢轅從知
餘雪須高詠應有陽春座上溫

答宋文學叔意和韻

出處何曾有異同豈於飛伏辨雌雄絕憐弱冠青雲客歲
晚遙傳白雪工夢度九峯吳市近歌來三柳冀群空衡門
不是龍門貴却喜通家刺已通

園梅盛開喜而有作

繞屋遍開三十樹巡簷喜占十分春香生即是羅浮夢色
照都成姑射身風信未催吹笛客花神不負灌園人廣平
已老雄心息作賦徒驚物候新

公瑕携具過小園觀梅澆成一律并邀同賦

小軒高唱鬱輪袍
花發春先與自豪
未許長庚吹玉笛
喜逢公瑾過醪醪
風生短徑清鷄舌
日照叢林白鳳毛
老筆定饒東閣賦
莫將口吻學兒曹

新正廿三日大雪

去年殘臘餘三白
今歲春融忽復來
豈是陽和尚濡滯
故令淑氣暫徘徊
將舒楊柳看仍勒
已落梅花擬再開
我欲乘舟無事訪
不妨扶策獨登臺

聞歌重悼子繩

新聲入耳幾何時
寂寞於今起夢思
不恨少年辭世早
獨

虞實生續集卷之五
二五
嫌老眼識君遲
雪消蕙草三春盡
月落空梁五夜疑
絃絕已無山水意
異方之樂使人悲

古意

車如流水馬游龍
蓬島瀛洲在九重
燕市酒人猶擊筑
漢京豪客已鳴鐘
牀頭寶劍千年秘
肘後黃金萬戶封
總是天驕塵十丈
紫雲常護茂陵松

寄題懋成王孫握蘭社

武昌高館鬱蘭叢
作賦應知臭味同
神女不須行暮雨
大王元自振雄風
邀賓共擬梁園在
開酒還教白社空
聞道春來多勝事
雙魚急為致詩筒

次韻荅孔炎宗公

天孫尺素慰離憂三鳥來從海上鷗家世裁圭桐葉貴心
期招隱桂藂幽兔園授簡俱神往鳧渚浮舟亦卧遊門下
應劉知不減喜傳新藻下滄洲

五夜枕上漫作

鴈燈殘焰半明樓夢破虛窓宿靄收風動五更花作雨寒
生四月麥成秋壯心未已空悲驥短榻難逢只扣牛病起
荷鋤稀種藥祗須萱草足忘憂

次韻荅趙仁甫郡理

憶昔池陽渺十洲素書曾寄亦沉浮高山有意憐同調明

月何須歎暗投塞上風塵驚失馬酒邊談笑狎飛鷗北堂
共喜靈萱茂日夕承歡足解憂

己丑夏五大旱撫臺周公虔禱不雨按院李公將至
先是戊子秋旱李公下車即雨

舊雨隨車直指功今年亢旱豈無同中丞未協山間夢少
女空占樹上風澤涸桔槔何所用川枯舟楫詎能通漢陰
抱甕本吾事汜至其如井養窮

喜雨

經時旱暵苦炎埃薄暮涼風送雨來仰協畢星占水氣頽
微封蟻對雲臺千林濯葉回春意萬戶歡聲殷夏雷已卜

嘉苗雙穎合呼兒先造一尊開

感民謠作

漫論粳稻自東吳 天子憂勤言有無
作雨空勞賢宰相 蠲租不獨大司徒
三江碧浪全疑陸 萬頃青苗半欲蕪
聞道民謠須柱史 隨車何日慰來蘇

凌錦衣護從 路藩之國便道歸省還朝贈之

帝子分茅出薊都 侍臣銜命護雲衢
輝承棣萼添行色 澤溢天潢潤使符
驛路饌鈞青玉案 名藩禮重執金吾
歸寧莫恨王程促 環衛方須照乘珠

新都有客自東昌遷居上海

新都豪俠客東昌攬勝江南逸興長
三泖烟波湖上棹千
金寶劍橐中裝洪崖徙宅開新賞
葛稚移居即故鄉
聞道華堂多瑞氣已知賀燕在雕梁

七夕得都下書時廟堂方以視朝為請

嵯峨金闕仗經綸千里音書問鈞緝
此夕彤廷鳥使幾時絳幘報雞人
江南旱潦關民瘼塞北烽烟探虜塵
莫笑杞憂深廟畫古來藿食是閒身

贈別顏國相范卿

平原家訓足名家况有縹緗富五車
官比江州白司馬遷同洛下賈長沙
三都詞賦千秋業萬里遨遊兩鬢華
聞道

乘潮應挂席須知八月是仙槎

賦得黎川晚霽題沈山人冊

老去休文小隱賢風流標格至今傳百年世賞黎川勝一
縷心香楚宇偏潦水烟光猶漠漠落霞飛鷺自翩翩蓮臺
更有遺容在好證三生石上緣

送沈清卿入京携令子同行

殷勤挾纊一綈袍江畔驪歌感濁醪水淨雪川鄉月迥雲
開帝座秩星高長河挂席青簾舫驛路傳經白鳳毛想得
離宮出遊處春嘗知欲獻櫻桃

劉太學枉顧有作報之

輝輝玉樹出中庭須信名家有寧馨多病馬卿應是渴少年劉向已傳經閉門愧我頭先白傾蓋憐君眼倍青三徑掃除知不負草堂昨夜帶文星

李夫人

舊事西京闕九重香銷別殿鎖芙蓉椒風一捲龍鬚席桂月頻窺馬鬣封草宿故宮誰協律苔深殿里不鳴鐘帳中忽見依然去腸斷朝雲十二峰

題蔣太守玉蟾山新阡

一丘何必按青烏三徑先徵夢玉魚道士無煩厭龍虎仙人已為化蟾蜍滕公石柳千年室原氏新阡五馬車地脉

定從方寸得應教吉壤屬元輿

贈吳二習甫吳為沈啓南氏外孫

道子箕裘屬後人相城宅相發君身解衣盤薄自能事簪
筆苦辛還絕倫無意信今可傳後有時擬古即成真百年
將半已如此會見老來猶入神

秋晚池上

池頭秋晚一娉婷身外浮雲柰我何最喜向長婚嫁畢不
須陸賈橐裝多松筠亦可成蹊徑魚鳥元非罽網羅湯說
輞川饒勝事城東別自有維摩

有感湯作

庚子年... 卷之五
從知酒肆好藏名滿眼升沉一達生幾見桑田經海變可
容人壽待河清三江市隱同梅福五嶽神遊亦向平短髮
不須羞破帽已將蘿薛作簪纓

贈曾孝廉人倩下第春官歸

竭來萬里倦遊身賦就三都兩鬢塵嶺表容君重結網江
干媿我老垂綸到時雪涕過殘臘歸路風雩及暮春計日
飛鳴應可待佇看挾策對天人

分得震澤為李使君賦

包山北望眇東阿雲樹連天紫氣多壁立數峰俱砥柱汪
洋萬頃盡恩波隨車時雨孚輿論動地春風起權歌不是

九重慳借寇彤廷方欲待鳴珂

夢文太史公寄予扇頭詩覺後次韻

三鳥啣書出玉京一緘重見故人情
扇頭翰墨新題字天上脩文舊策名
此日鴻冥慚後輩昔年龍卧憶先生
閉關已謝西州路腸斷寒宵短夢成

葉慶元諫議書儀見存

私車久已謝追隨夢冷長安躍馬時
豈為平津開閣晚自緣魏勃掃門遲
支離生計餬予口粗糲儒餐媿母慈
青瑣故人勞見憶雙魚忽下鳳皇池

鄭思成戶部以詩見示奉贈

使君幽興託風騷逸思翩翩付綵毫通籍十年應宦拙齋
糧千里亦名高經綸自世弓裘業出納猶親案牘勞谷口
不須猿鶴怨池頭方惜鳳皇毛

石湖會葬魯望志感

石湖風物使人憐故賞心驚石上綠寬博十年居士服煙
波一棹孝廉舫眼中鸚鵡生前酒望裏牛羊墓上田邊說
中郎家學在豐碑誰為勒原任

五言絕

季布

古人推季布一諾千黃金今人重然諾應存季布心

風露

風過書動几露滋蛩吟壁風露自無情亦足破岑寂
平康曲

昨日君憐妾今朝妾憶君空令淚如雨不復夢行雲
讀高禮部饒刑部疏

奕世掌絲綸皇恩重鼎臣須知折檻者不是掃門人
古意二首

刺繡妾應留行役君須去朝來春鳥鳴却是傷心處
妾命風中絮君恩水上萍命於恩比薄不得怨卿卿

春遊

春花不泮旬春晝忽以夕急須秉燭遊况乃婚嫁畢

徐少宰寄示義田役田帖

敦睦仁恩洽均徭義澤流須知登鼎鉉博施徧神州

周令君示吳縣緩徵帖

次第催科政申重渙汗文寄言諸父老不得負神君

景魏自荆溪歸亡其愛女阿泰慰之

敝刺懷歸晚空山瘞玉深須知金瓠戚應作棄瓢心

七言絕

題休承張公善權二洞圖

披圖溪上物華新舊雨凋零三十春百里名山身不到神

遊八極是何人

贈妓并戲主人

穠粧嬌臉出當壚我見猶憐况老奴只恐明朝又中壑風
前且莫舞矍瑜

白頭吟

琴心昔日試成都那得邯鄲事獨無若說相如情不薄還
來一問舊當壚

題唐解元杖頭錢小幅

溪流一曲足風烟鹿夢初驚野興偏莫謂錦囊惟繡句杖
頭還有買山錢

處實堂續集二八卷之五

二十三

添字集句

誰云死別已吞聲腸斷看山獨送行一自曲終人不見至
今噉噉夜猿鳴

豪飲

當時豪飲竹林同投轄何須陳孟公寂寞於今成獨醒空
樓支枕月明中

題鴉鵲圖

鴉鵲聲中辨吉凶鴉鳴鵲噪若為同須知禍福常相倚不
信還觀塞上翁

七夕

歡娛何暫恨何長
一夕空勞渡鵲梁
不若從來不相見
須知牛女羨參商

懷子繩

平臺酒次芙蓉月
曲沼歌邊楊柳風
一自蓬山徵協律
祗今惟有夢魂同

又旱得雨適按臺李公下車

片雲信宿望全無
一夕歡騰涸轍魚
御史自來推決獄
到時應有雨隨車

白露日夢俞僉憲士立

白露橫江秋氣催
使君歸未夢先來
經年儲得牀頭酒
計

日還傾花下杯

樂毅

昔年樂毅自魏往今日封書從趙來假使郭隗身尚在應
知悔上黃金臺

殘編

東方讀書一囊米劉向傳經三十年老去未能燒筆硯閒
來時復檢殘編

塞上曲二首

傳聞天子勒燕然正是呼韓款塞年為語胡兒休牧馬只
今飛將欲臨邊

邊庭車馬獨閑閑
萬里黃雲閉玉關
湯說匈奴射鵰手
停鞭揮淚過陰山

逃亡謠

兩年逋負一時償
更有催租吏下鄉
漫道秋成堪作樂
相傳長策是逃亡

設小坐於家人出入處解嘲

斗來一室僅容膝
掃去萬緣成鏡機
漫學監門抱關者
不問空谷足音稀

感事

已夷舊宅鞠為田
未幾荒丘生野烟
昔日孟嘗門下士
河

濱別候入京船

奉和趙少宰賦靈洞山房十二景

然藜鳴玉紫宸朝別有烟霞洞壑饒
綵筆只今干氣象翠微應見赤城標
右古洞樓霞

雙開玉鏡戲銀蟾不待珠光夜色添
應是五樓懸倒景千秋常挂水晶簾
右天池淥月

躡磴梯巖四望周孤高不許衆山侔
白雲何必重回首紅日應須近舉頭
右中嶽干霄

誰移海上玉芙蓉環繞羅關三兩重
欲問飛來自何處巫山今作九疑峯
右三山環壁

豈必縹緗富石渠洞雲深護鄴侯書何當負笈尋真去問

字還來辨魯魚

右石屋藏書

翠微寒澗激琳瑯疑有牙琴奏石牀礪齒不須重洗耳清

朝元自待含香

右澗泉漱玉

片雲忽過楚王臺授簡應誇作賦才莫訝無心還出岫九

天霖雨待君來

右片石飛雲

水崖飛霰鎖瑤枝想見袁安僵臥時莫道陽和易銷歇孤

高常駐歲寒姿

右瑤崖積雪

滂憐蕭索百愁生古寺踈鐘雜梵聲大小若為隨扣應東

隣今是舊司成

右梵刹鐘聲

孤亭山半息歸樵相對都忘山徑遙莫怪夕陽噓笑語主

人元不厭芻蕘

右山亭樵語

笙簧隔水奏松風曲逕巢雲鳥道通正是熙朝須碩輔豈
容弘景在山中

右雲徑晴松

一行濯濯帶烟汀雨過溪橋春漲平誰道千秋彭澤柳風
前曾寄上林鶯

右溪橋烟柳

戲示筆工

多着毫毛少着麻牢椿斑管莫欹斜但將紙上供行草不
用庭前掃落花

傭書

君平賣卜頭應白季主垂簾思獨玄莫笑傭書殊鄙事積
錢亦可助烹鮮

殘梅

交加玉樹半離披彷彿羅浮夢斷時莫恨風前易零落孤
標還駐歲寒姿

西山種松二絕

萬壽神宮紫氣重廷臣交疏辨來龍金臺桃李無人植盡
向西山學種松

明詔採松期六尺庭前丈五作龍鱗須知種樹猶如此莫
笑馮唐易老身

題馬姬畫蘭竹

竹翠蘭芳身外身
湘波曾待月傳神
秦淮別有濡毫處
豈必崔徽解寫真

白鷗

曲池曾借一雙飛
淺水蘆花見已稀
何事滄江偏易狎
烟波深處自忘機

園亭春暮

小園三月物華新
寂寂池亭生網塵
一任桃花自開落
已無歌扇度陽春

小齋春暮

沉香緩蕤紫烟生
棊几蒲團無世情
支枕不知花落盡
起來惟見綠陰成

汎舟

蘭橈桂棹泛菰蒲
雲白山青酒一壺
到晚何妨隨處泊
風波元不在江湖

雨中池上

知魚何必俟蒙莊
驟雨新波錦鬣張
永日捲簾池上坐
悠然吾與爾相忘

為人題素綃二首

織就巫山一段雲
千絲萬縷若為分
別來紅淚知多少
點

點從前說與君

冰統一幅奉晨昏不待迴紋亦斷魂此去若儂新粉面須知曾拭舊啼痕

戲問茂實

聞君聽講學參禪我獨拋書日午眠君罷講時吾睡醒不知真覺屬誰邊

題秦嶺吹簫圖

豈是吹簫近五城曲終身已在瑤京一從鳳去無消息夜夜緜山空月明

榴實

小庭秋入火西流滿眼繁枝實海榴
笑口齊開報多子須知滾滾出公侯

夢中口號

隔簾聞說謫仙才入座龍園止一杯
正是相如病消渴金莖玉露自天來

分詠瀟湘八景得山市晴嵐

霖色朝開紫翠繁千家貿易動村村
洗粧村婦看山出不是城中倚市門

營肉食未得自嘲

劉郎不得子鵞炙畢卓何緣持蟹螯
老我未能安藿食擊

鮮猶欲溷兒曹

紀夢

當時相對已忘情此夕相逢意獨傾
自向夢中酬一諾不須石上證三生

已丑秋日鴛鴦再歸二首

看花不羨宜春苑避暑應過銷夏灣
自去自來如有約年年秋入薜蘿關

太湖三萬六千頃鴛鴦七十二成行
誰謂曲池惟半畝烟波亦自足鷄翔

題群仙拱壽圖

西池王母讌群仙南極流輝寶婺懸何必人間論甲子即
看桃熟已千年

題停車圖

倦游無乃似相如牛角疑懸後漢書清世豈無人勸駕秋
林容得爾停車

入邵園

東陵老去有聞孫愛客池頭晚命尊不道野人貪看竹扶
藜突入辟疆園

蟹

霜落田間禾黍饒爭持一穗夜趨朝沸曹正見橫行處不

道江千障縑簫

卽事三首

黃扉石畫賑蒼生青瑣銜書走百城郡邑大夫歡帝澤壺
漿何惜夜逢迎

文錙趣出建康城內帑無煩發大盈官吏下鄉行賑令石
壤雞犬不須驚

夷王德澤下蓬蒿發粟應知出鉅橋信是漢廷長孺節不
須比屋問延燒

題秋江待渡

江豚吹浪沸洪流颯颯寒蘆十里秋滿眼風波行不得岸

傍閒却濟川舟

鶴鷄

安居不待問蒙莊信是無常却有常
喙翼何須田鼠化已
知七宿耀南方

楊梅小鳥

索索朱實滿喬林風味何如荔子深
却笑踏枝爭食者看
來元不是家禽

可中亭懷子繩

當年絕唱屬秦青一曲渾疑理鳳笙
今日亭中點頭石不
知可得證三生

鶴鴿

紅蓼蕭蕭野水湄
斷腸應憶在原時
若為布粟成謠後
復有陳王煮豆詩

雪中嘗金陵陳簿寄惠香菜

謝庭玉樹撒鹽初
委巷袁安僵卧餘
若謂故交俱冷淡
糝鹽誰寄甕頭蔬

題嚴灘圖

雲臺勲業眇誰倫
豈獨椒房失老臣
惟有桐江舊時月
一鈎常繫漢經綸

詞

愁花令

花不開時花未好待得花開勝得春多少
凭闌欲作賞花人難教花知道又怕花嫌人老
雨慙風儻烟啼霧嘯醞釀一春懊惱想司花
吏年紀小愛調未諳曉把花信都顛倒

滿江紅 自遣

負郭良田營數頃竟成鳩拙儲石所供
餽粥僅充旬月任待哺一家交遍
謫勝含饑萬戶爭啼血筭生涯五斗不
難求腰難折萱草茂蘭芽茁烹蟹眼
燒雞舌正綠肥紅瘦清和時節
餬口莫妨開口笑達生自與謀生
別看當年

綠鬢鏡中人今成雪

風光好二闕

悼子繩

惜芳年痛芳年綠鬢仙郎何處仙使人憐與君世世為兄弟難拋棄重結來生未了緣夢中天

驚何親蟻何親回首山頭不見人夢難真尋常一樣窓前月成永缺大家携酒哭青春獨傷神

青衫濕

虎丘志感

鐵花巖畔千人座何處挹餘芬舊時酒次風流標格化作行雲恍然在望清溫衛玠白練羊欣當年聞笛山陽出涕未是消魂

青衫濕二闕

空梁月落無顏色不復繞清歌
火烈西崑珠沉北海夢斷南柯
調高絃絕周郎誰顧空復婆娑
排愁破涕憑誰處置一付維摩

嚶嚶夏木黃鸝嘒未足比清謳
水逝無波雲歸失影月落沉愁
勝會不常盛筵難再湯自追求
臨文嗟悼憑誰處置一付莊周

如夢令

漫說栽培傾覆自合參商卯酉
時序有春秋那得賞心長久
絕口絕口情到不堪回首